



KBC/Thuso

So498

Regd.No.19134/88
<http://www.kbc.org.in>
NAI/220/99
No-G-4/Regd.Magazine
/KBCThuso/MNP-81

Kum 57 Ihinna

Phallha/November 2020

Exchange TOUR

- OCTOBER -

Christian Neichin

DECEMBER EVENTS

Sunday School Kumlhun themvet - 06
Bible Sunday - 06
Department Assemblies - 9-14

"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

John. 17:11



Rev. Dr. M. Thongkhousei Haokip, General Secy.,
in Mongkot Baptist Church KBC a ding in lahlutna ana neitai.



Office a Secretary hon Former General
Secretary, Rev. SN Gangte a inmuun New
Lambulane ah vilna le taopehna ana neiun ahi.



Secretary hon Joujangtek Centre Church vilna ana nei.

CONTENTS

THUMAKAI HO

| | |
|---|----|
| Christian Neichin/ <i>Editorial</i> | 2 |
| Jesun Angailut Chapangho/ <i>Mr. Lalbem Kipgen</i> | 4 |
| Tahsa le Lhagaovin Hat inlang Hang in/ <i>Rev. Onkho Haokip</i> | 7 |
| Mission Column | 13 |
| Men Column | 15 |
| Women Column | 16 |
| Youth Column | 17 |
| STS Column | 18 |
| Development Column | 20 |
| Office Diary | 21 |
| Hetna Belap | 27 |

EDITORIAL BOARD

| | |
|-----------------------------|---|
| <i>Chairman</i> | : <i>Rev. Tonglet Haokip, President KBC</i> |
| <i>Editor</i> | : <i>Dr. M. Thongkhosei Haokip, General Secretary</i> |
| <i>Joint Editor</i> | : <i>Rev. Onkho Haokip</i> |
| <i>Contributing Editors</i> | : 1. <i>Rev. Thongkholun Touthang</i> 2. <i>Rev. Lamkeng Lhouvum</i> 3. <i>Rev. Tongmang Haokip</i> 4. <i>Pi Lhingbem Haokip</i> 5. <i>Rev. Lunkhosei Tuboi</i> 6. <i>Rev. T. Thangkhosei Haokip</i> |
| <i>Design & Layout</i> | – <i>Pu S. Lenboi Haokip</i> |
| <i>Circular Manager</i> | – <i>Pi Vahboi Baite</i> |
| <i>Recorder</i> | – <i>Ms. Nemhoichong Haokip</i> |

THUSO LAHMAN

Church/Organisation/ DepartmentRs. 300/-
Individual Rs. 200/- (Post a Rs. 250/-)

Indian Overseas Bank, Imphal Branch
A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 70895979446 Contact thei.
Circulation to kisai lam Mobile No. 9862107393 bol ding.

Editorial...



Christian Neichin

Editorial

"Leiset le asunga um thil adimset a kikoihi aboncha Pakaiya ahin, vannoti pumpi le asunga cheng jouse jong aboncha a Pakaiya ahiuve" Psalms 24:1.

Thumakai:

Amasatah in muntina um Kuki Christian chate jouse ahideh a KBC member ho jouse chungu i Pakaiyu Jesu Christa minin salaam kahinpe cheh uve. Tulha thupi chu "Christian Neichin" kiti ahi toh kilhonin, hiche thudol ah chomcha ana kihoulim u hite. Ningkum issue a neichin in ahop nei-le-gou ahilou le sum-le-paiya neiching thudol ina seiyun, hiche article ah hin Pathen thilsem adeh a leist gouching ihidanu ana kihoulimu hite.

Bible a Neichin Umje

Bible ivet le Neichin hi chena ding alhongpi (principles) li aseiyi, hiho chu:-

- 1. Anei hina (principle of ownership)*
- 2. Mopo hina (principle of responsibility)*
- 3. Tohphon Phong ding hina (principle of accountability)*
- 4. Kipa man Sanna ding (principle of reward)*

Genesis 1:26 apat isim le mihem hung kistem dan le thilsemho chungu mopo ihu thudol imu uve. Hiche mopohna hi chungnunna (dominion) ahipoi. Thilsem dang ho tichu leiset le asunga gancha, vacha, nga chule gam-le-go hohi anei tum um ahi, hichu Pathena ahin, mihem te hi aching ahibouve. Hiche impohnau hi nikhat teng le aneipa (pakai) henga impohna hou tohphon (account) ipeh diu ahi. Hiche dung juiya ibolphat/phalou tohman ikisan diu ahi tina ahiye.

Achuti le tulaiya Kukiten gam-le-go chungu mopo ihinauva leiset muchi-chivo pha kitu louva muchi phalou kitu dimset hohi iti igel diu hitam? Koiyin mo potan tem? Abol hohi koikoi hiuvm, houbung mi ahilou le tahsan chate hilou ham? Houbung ho alamkai hon ipi ahilu ham? Hiche muchi phalou kitu jalla khat le ni haodoh jong le icha-itu ho dinga akhoning dingu isuhset peh u hilou ham? Haosaho kigel phaute, eiho gam ahipoi, Pathen a ahin agouching maimai nahiuve. Tahsan chate le houbung miho, kigel phaute. Bible titah lou mihem kivaipohna aphaallou ho bol hint hu ngailouna ason, thungailoute chan ding gotsa a um ahiye.

Thu Khumkhana

Pathen thupeh ngaiyin kitihi tulai ding deh deh a kul le ngaikhoh ahiye. Hou lamkaiho thu juiyute. Government in aphaal ho chacha bou bol leuhen ilungsunga chamna le kichat louva hinkho iman thei diu ahi. Kicha pumpum le kioimo pumpumin hinkho mang poute, hichu sohchanna ahi. Lunglut tah a sim jouse chungu Pathen vangpeh chang taken.

Jesun Angailut Chapangho

(Mark 10: 13-16)



Mr. Labem Kipgen

• Director, Children Department, KBC

ARTICLE

Thumakai

Chapang kit ithucheng hi mi konkhatnin akingai nom hihbeh jengin ahi. Chapang kiumthimin, chapang naphabep min kium in kiti aw cheng hi akiseiteng kimusitna le kinoisena kamcheng jong ahin koimacha in vang kingai nom tah bah louahi. Hinlah Pakai Jesu christen chapang banga lungthenglou le kineosahlou chu vangam lutlouding ahi ati tia chapangho ngailutna aneihin chapang hinkho thupidan le aman tam dan eigeldohsah un, hijeh chun Jesunchapangho angailutdanthu in lunggelkhomnale kihoulimna nei u hite.

Ipinga a JesunChapang neo hochu ngailutna achanna chule Aseijuite chun ipidinga chapang neo hochu athei nom lou u ahidem?

Jesun chapang neoho angailut hi chapang ahijehuva amohngailut ahapon, chapangte lungput le lungthim chuPathen gam jotnadia lampi phatah ahijeh a hitobang lungput neiho chuJ esunangailutahi.

Nangle keijongJesun eingailu uvinchapang neo ho lungel le lungput neipum a lampi ijotdiu hi Jesun a dei ahi.Alangkhata seijui dang hochun Pathen gam jot nadingalampi chuitobang ham tia he them pou vin ahi. Jesu nungjui ahijeng vang uva alungput leu alunggelu hi Pathen deivangchu ana hi pon ahi.

Jesun chapangte angailutna jeh pen tahchu ipi ham iti le Alung

put leo alung then nuhi Van-
gam jot nadia lampi ahijeh ahi.
Vv.14-15.

Chapang kiti hi Pathenna kon a
phatthei chann alen pi tah ahi
tihi suhmillouding apha. Cha-
pang phattheina changjoulou
insung chu kinahna le bouina
insung asohdoh teijin ahi. Jesu
Christa khanglai jenginjong
chapangnei kiti hi phattheina
loupitah chang in akigellun, hiti-
chun Pathen kom in analhando-
hjiu vin ahi. Hitobang chondan
le thilbol Pathenn akon a phat-
theichanna ding adei jehuva
minu mipa tam tah in achate
chengseu chu phattheichanna
ding a Jesu ang sung a ahin-
puit nu ahi. Minu mipan ach-
ate Jesu ang sung ahinpuicheng
se hin Jesu akonnin phattheina
angaichao vin Jesu chu atah
san nu akichennin chule Pathen
nakan a gou achan ujong agel-
doh uvin ahi (ven chatehi Pak-
aia kon gou ahin, naobu sunga
pengdoh jong kipa man ahije
Ps.127:3).

Alangkhatna sei din chapang
techu thupi a ana gel lou vu ahi.
Hinlah Jesun seijuite anahilsa
Mark 9: 37 na a "Koihi jongle
keima min a hitobang chapang
chakhat sanga chun keima eisan
ahi"; tia anahil naho chengchu
seijui ten anasuh mil u ahi tai.
Seijui ten chapangho ajahdau
chu Jesu alungnommo tan Cha-
pang hochu jahdalouva aheng

a ahungtheina dingun thu ape
tan ahi. Jesu kom a umding le
Jesu heng jondinga chapang-
teJesun adei hi chapangteadia
phatthei channa lentah ahi tai.

Hia Jesu Christan thu poi mo-
tah aseichu ipi ham? " chapang
neo tobanga Pathen gam sang
louchu itinamajong le chua lu-
tlouhel ding ahi". Tunin eihon
chapangte chu asang a len le lal
ho umchan vetton din iseipeh
un, ahin Jesu in vang chapang
neo ho lungput banga lunggel
neija hinkho man din eiseipe-
huve.

Ipi Lampia Chapang bang a Ei-
hon Hinkho Iman dingun ham?
Chapang neo hobanga hinkho
man ding kitihin adoi le atop
chui pi ham? Chapang bang
umu hitin amaho umchan chan-
nin um taohite tinavang ahideh
poi." Kineosah, changkisona
umlou, ngaidamtheina, chule
ima ahilou akihetdanu" hicheng
se hi chapang lunggel a um
ahin hitobang lungput hi eihon
ineisohkeidiu hi Jesun adei ahi.
Chapang khat chu akisukkhah
ham ahiloule bouina khattou
aneileh anu apa ham asopi ham
koma alhutna ahetsah jengahi.
Chapang le pilhingkhat kikhet-
danvang chu mipilhing khat-
hun phulah ding ham ahilou le
ichangei ham khatna hinkho ak
ihoulouna dingchan lungel aki-
nei theijin ahi. Hitobang lungel
le lung put chu Pathennin ad-
eilou ahi. Chapangdia kingaina

minu le mipa ahibanga Pathen jong chu atahsan te adia imajousea kingaina ahi ding hi Pathennin adei ahi.

Chapang ngin anu apa atahsan banga Pathen jong eiho adia tahsan um tah ahi. Tahsanjalla eihon jong tunia Pathen gam ilodiu ahi. Pathennin eipehthei ding ahi, aman imajouse eigonpeh ding ahi t itahsan chu Pathen in eiho akon a angai chat ahi.

Jesun chapangho angailutjeh in phattheijong aboh in Ahi. V16. Chapang neo hochu mipi ten theida jengjongleu Jesun vang chapang neo ho to phat mankhom ding anom tan ahi. Pathennin phatthei eiboh ding kitihi echan a thanop le kipa umding hitam? Mijousen Pathen nakon phattheina akingai chasoh keijin ahi. Seijuite le mipijouse jong chunphattheina angaichat jehuva Jesu nung anajuiju ahi. Bible akona kimu dungjuijin Pathen nakon a phatthei nachan kiti hi vangphatna lenpen ahi tai. Vetsahnan; Abraham, Jacob, Joseph, Job.....kitihohin Pathenna konna phattheina lentah anachang uvin tunin eihonjong amaho phatthei channa chu imu taovinahi. Min atheida le min imacha agellou chapangneo hochu Pathenna konnin phattheina achangtaovin vanggam lutthei nading lampi jen-

gjong chapang neoho banga kineosah le milungtheng teho abou ahidan kichen tah in Jesun eihil taovin ahi.

Thuchaina: Chapang chu achonna ding dola kilomin khoukhah in, chutileh atehgeija jong hichu asuhmil louding donlouva akouilou ding ahi (Prov.22:6). Minu mipa tamtah in chapang hinkhosem hi anahsah behtapon, nungah gollhang tamtah ajotna ding mun helouva leiset lunggaina ahinkho le aphot manga mi tamtah aum tai. Chapang aneolaija hung kikhoukhahho vang lolhinna lampi chu ajotteijiu vin ahi. Timothy jong chu chapang neocha ahiapat hung kihil le hungkipui hoi ahijeh in khonungin Christa adin sepia phatah ahung hitai. Tunin jong chapang neo ho phattheiboh dingin Jesu akoujinguve. Minu le mipa ten jong achon nading loma khoukhah angailleh jeng tan ahi, chapangtia not thap nale theidana vang bol pouhite. Pathen angungin alen le aneo, ahaole avai aumchom poi. Chate hi Pakai akon gou ahi geldoh pumminchapang hinkhosem nale alhagao lampi semdoh ahinadingin minu le mipate Pathennin eingan se uve. Ajehchu Pathennin chapang angailun phatthei bohdingin adeijin eiho aching dingin eingan seuve.

Tahsa le Lhagaovin

HAT INLANG HANG IN

Deuteronomy 31:6

~Rev. Onkho Haokip

Sermon

"Hat jing uvin lang hang jing uvin, amaho khu kicha hih hel uvin, ging jong ging hih hel uvin; ijeh inem itileh nangma na kilhonpi jing jeng hi Pakai na Pathen, Ama ahijing nai; Aman na thonsah louhel ding da jong na dalhah lou hel ding ahi," ati.

Mose chu Israelte Egypt akon gamthip gam chan lamkai ding'a ana kinganse ahin, Canaan gam alut diu phat'a lamkai thah, Joshua kingaicha ahitai. Pathen in Joshua le mite heng'a akilamkai ding dan'u thumopna ana nei ahi. Lamkai luihon lamkai ngahje het'a lamkai thah ding mun ot ding tina jong ahi. Pathen akon'a nganse-na kicheh nei lamkaiho in Pathen akon'a hansanna le hatna chule Ama umpina kicheh tah anei jiu ahi. Pathen in mi akouva ngansena apeh'a chule alhonpi thei hinkho kitihi thupi le mantam ahi. Israelte in mailam'a akimaitopi diu Jericho, Ai chule khopi tamtah le leng tamtah um ahijeh'a Pakai akon hatna le hansanna ngaicha ahi. Lhahsam jeh'a hansana ding'a kitilkhouna ahipon, kimaitopi dingho let jeh joh ahi. Pathen in mihemte adinmun cheh uva hangsan tah'a ana tong ding'a adei ahi. Pathen angung'a din jangkei masat ding chujouleh Satan toh kidintena'a hangsantah a dinjangkei ding ahi.

Pathen ngansenaho boldoh hi tahsanna galsat ahi (1 Tim. 6:12). Mihem in vangam angai behseh jeh'a leisetna Pathen in angansenaho asuhmil ding ahipoi. Leiset angailut behseh jeh'a vangam'a adinmun ding akisuhmil ding jong ahideh poi. Eihon leisetna gal

isat uhi vangam ilhun teng uleh kipaman isanna ding'u ahi. Hinkhoa itih tah leh boina ahung lhun ding kihelou ahi jeh'a nitin'a hat jing ngai ahi. Paul chun lhaitet golseh asehchai theina ding'a hat tah le hangsan tah chule gentheina tintang ana thoh thu ase in ahi (2 Timothy 4:7). Hiche leisetna hinkho imannauva hin hatmo le meidoi thei ihipouve. Mijouse in nikho jouse hi nikho pha ahiding akidei cheh in, ahinlah hichu ahi jing jipoi. Eiho tahsaphe le thisan toh kibon hilouva Satan le anungjuiho toh kibon ihiuvin, ihat jing'u ngai ahi (Ephesians 6:12). Hinkhoa thilse ahung lhun tengleh lhagaova lhahsam ding; hinkhoa thilpha ahung lhun tengleh lhagaova hatdoh kitji ding ahapon phat jousea Pathen'a kisuhhat'a hansan ding ahi.

Israelte ding'a Manna chu gamthip gam'a neh ding'a kipe anahijongleh Canaan gam'a neh ding hilou ahi. Pathen in Israelte chu gamtep gam alhun theina ding uva gamthip gam'a phattheina ana peh'u ahi. Pathen thilpeh phattheina ineihouhi Pathen tepna vangam lhunna ding'a eikipeu ahi. Pathen thilpeh phattheina le Pathen tepna gam na hetkhen louleh Pathen

phattheina (manna) a na pum ngolden'a Pathen tepna (Canaan) gam lhunlelna'a na neilo thei ahi. Israelte chun Gamthip gam'a kum 40 sung'a an baises hon minsa ana neh-u ahin, Canaan gam avang amahon akihon ding'u ahitai. Pathen in achate chu gamthip gam le gamtep gam'a anneh apeh dan kibang lou ahi. Naosen apilhin ding tengleh noitwi a-ngol bang'a Israelte jong apilhin ding tahjeh uva Pathen in avahnau Manna chu asuhhai ding ahitai. Gamtep gam chu nang ding'a gotsa ahin nang na hansan ding bou vat ahi. Gamtep gam na lhun koncha hita maithei ahi.

Pathen tahsanna inei jeng seh-u hilouva Pathen in eipeh-u boltheina ineihou jong itahsan'u ngai ahi. Na lhunna ding mun (gamtep gam) na lhun theina ding in boltheina le seitheina chule sumlepai tampi na nei tei tei angai pon ahi. Samson chu amelmate in tha ding'a ana umkim vel uchun amakom'a Chemjam, Tengcha, Meithal le Bomb imacha ana umpon, aman amaiphah pen chu Sangam khagu bou anahi. Hichu hangsan tah'a ana manchah bou ahi. David in Goliath ana kimaitopi chun akhut achun songchang chang nga le gophel bou ana

kichoi in ahi. Hatna le letna chule galsatna lam'a sei ding in Goliath chu ahatjo, alenjo le ath-emjo ahi, ahinlah Pathen ang'a hat le hangsan chu David joh anahi. Eima mitvet'a ineilouho jouse Pathen kom'a thum thum sang in Pathen in eipeh hatna, boltheina le seitheinaho joh phatea kisempup'a galjona le hindohna'a nei ding hi athupijo le lolhinnajoh hiding ahi.

Mose in tenggol khat ana neiyin hiche chu Pathen angsung'a hat tah le hangsan tah'a amanchah jeh in kihuhdohna le galjona in ananei in ahi. Na khut le na hinkhoa sumlepai tampi na nei angaipon, na tahsa jong lentah aphah tei tei angaipon, na chihna le na thepna jong asan tei angaipoi, na mel jong ahoi tei tei angai pon, amavang na neikham kham achu hangsan tah'a na pan leh Pathen jal'a na lolhin'a gamtep gam na lhun thei ding bou ahi. Pathen in thil neocha cha mang cha'a melma lentah tahho le boina lentahtahho akon'a galjona le kihinsona eipeh theiyu ahi. Eima hinkhoa aumlou le ineilouho seisei sang in aumsese Pathen hatna song'a manchah thei ding hi thilpha ahi. Hichena ding chun hat inlang hang in, Pakai Pathen chun na hin panpi tengleh na na lhun-

na ding mun na lhun'a chule na tup le doina munho na lolhin ding ahi.

Ilamjotna le ihinkhoa Pathen in ei umpi kitihi thupitah ahi. Ajeh chu Pathen chun man gang tah'a jong na atoh thei chule ngongkai jep ajong atoh thei ahi. Mihemte hin hinkhoa thil hunglung ahilouleh ilamjotna'a ilhunna ding lungtup inei cheh uvin ahi. Hiche lungtup kineiho hi abang kom leh itih leh kilolhing ding ham ahilouleh itih leh hung sohдох ding ham ti'n ana kigel ji'n ahi. Pathen vang chun thil ijakai hi mihemte in phat asim dungjui uva jong asosah jeng thei ahin, kin tah'a jong ahinsosah thei ahi. Nangma kigel invang nangma hinkho sung'a jong na lungtup moh lhun lou ding in na gel in ahi, ahinlah Pathen in vang itih phat phat hijongleh van kot hon je ahet ahi. Mihemte in phat ikisem uhi khat ahin, Pathen in aneisa phat khu achom ahi. Amos themgao chun thil ijakai chu mihemte gelsang'a gang ding in ana seiyin ahi. Amos 9:13, "Ven, nikhoho ahung lhunge, tin Pakai chun aseiyin; Loukaiya pang in jong chang at pa ahinphah thu ding, Lengpittheiga chilpan jong amuchi tupa aphah thu ding ahi; Molsang jousea jong lengpitthei

lhum long ding, Thinglhangedung jousea jong lenpgithei lhum jeng long ding ahi."

Pathen thilgon dungjui in thil alhunggei ding jong aum in alhungvah ding jong aum in ahi. Mikhatpa hi a School uva Basket Ball kichem themtah khat ahin, amapa chu College a kichem nom ten ahin, ahinlah School a kichem ahijeh chun College a kichemlah'a amoh jao thei pon ahi. Hichun Pastor khat aga kitao sah in ahileh, Pastor-pa in adalhad jou minute 10 jouvin College a kichem ding in Phone Call amupai in ahi akitin ahi. Aman agel sang'a man gangjoa Pathen in thil ahinlhunsah ahitai. Hiche chu Pathen in thilho man gangtah tah'a alhunsah ji jeh ahi. Man gangtah'a thilbol Pathen ineikhah jeh uva Amin ithangvah diu ahi. Pathen amangang dandan chu nang in muchi natu jinglaiya jong aga lo ding hung umdoh thei leu ding ahi. Hicheho jouse bolthei chu man gangtah Pathen ahi. Tunin jong kicholdo louva muchi chu hoitah in tu jing in man gangtah Pathen in man gangtah'a aga na hin lo sah thei ahi.

Munkhat ahin pasal khat hi agenthei mama jeng tan hiche jeh chun aloipa kom'a chun kithopina athum in ahi. Al-

oipa chun jing tengleh Bank Account a themkhat hin thoting'e ana ngah in atipeh in ahi. Ahinlah chomkhat jouvin mi kithopi gotpa chun Phone Call amu in, keihon kiloikhomna khat ka sem uvin, hichea chu tibah khat (member khat) mai-maiya na hung pan leh keihon lhaseh'a sum phabep bep ka peh diu nahi atiuvin ahi. Hiche sum amu ding chu aloipa Bank Account a athot got sang'a jat som'a tamjo ahi. Hichepa chun muchi atupan pan ahivang in aga lo ding akom'a ahung lhung jeng tan ahi. Midang phatthei na boh leh nang ding'a jong man gang tah'a Pathen in phattheina ga ahin lhut jeng thei ahi. Mikhatpa hi kum somni le thum khamna theiya kisa ngol ahitan, aneh adonho chu a ngol thei tahlou ahi. Ahinlah nikhat hi TV avet leh Pathen thuseipa khat in khamnathei ngah ding dan le mihem hinkho mantam dan aseki akingaidoh in ahi. Hiche akon chun ama le ama akisuhat in hangsan tah in pan alah in khamnatheiya akibolbaina jouse chu apum ngah tan ahi. Ama chun kum somni le thum khamnathei ana neh ahin, ahin ngahna ding chun kum tampi lut ding'a kigel hijongleh Pathen jal in man gangtah in anga thei in ahi. Pathen natoh le thil-

gon hi mihemte thilgon le phat gon abangpon, anop leh gang jeng thei phat akhintoh thei ahi. Canna khoa Moupui Golvah achun lengpitwi akilhasam tan ahi. Hichun Jesu in twi belgup chu miho twi asundimsah in mitphet kahlouvin lengpitwi akiso-sah tan ahi. Adihtah'a lengpitwi (Ju) hinsem-dohna ding'a muchi tu ding, hung khang doh ding, at ding, bil ding, nikho le kum phapep lut ding ahi. Hicheho jouse chu akigop leh alhompen'a kum thum chu lut tei tei ding ahin, ahoijepho chu kum sagi lut ahi akiti'n ahi. Leng-pitwi kimkhat dehdeh chu kum somni cheng akoi uva chihthet'a akoiujiu ahin, hicheho chu ahoi-ho mong mong hui ahi. Ahinlah Jesu in mitphet kahlouva leng-pitwi asem-doh jeng thei ahi. Ajeh chu Jesu chun mihem phat gon bang'a na atoh ahipon, Ama deiphath phat'a na atohji ahi.

Jesu in thil kidang abol masat-pen hi man gangtah'a anatoh kimudohna ahi. Ajeh chu kum thum apat kum somni sung lut ding chu Ama in mitphet kah-louva asem-doh ahitai. Nangma in na thagum le na mihina a kum somni na suhlut ding jong chu Pathen in tuni na hin peh thei ahi. Na hinkhoa na ngai-

chat penpen chu Pathen in man gangtah'a na hin bolpeh mo ahipoi. Munkhat ahin numei khat hi athin (liver) nat jeh in athin chu akikhel (Liver Transplant akibol got) leh, thin kikhel ding atambehseh jeh in amanu achu kum nga jouleh ahinphah pan ding in aseipeh uvin ahi. Hichenu chu alungkham mama jeng tan, hiche kum nga sung jong chu hing jou ding in akigelpen, Pathen heng'a atao tan ahi. Kidang-tah in hapta ni sung in mi khat in Phone ahinbol in ama ding'a thin kikhelna ding lampi ahin-seipeh in ahi. Amanu chun kum nga anga got ahin, tunvang hapta ni kah in akiboldoh tan ahi. Pathen in na atoh tengleh man gangtah a atoh thei ahidan akiphochen in ahi. Amanu tobang'a nang jong Doctor-ho in kum tampi na tep peh maitheiyu ahi, ahinlah Pathen lunglam ahileh man gangtah a na damdoh jeng thei ahi.

Pathen in na pui tengleh nang gel bang bang'a phat achal tei tei angai pon ahi. Aman man gangtah'a jong na pui thei chule man gangloutah ajong na pui thei ahi. David chun kelngoi ana ching in koiman ana hep-hapon chule apa jeng in jong Samuel angung'a puidoh kham

jong anasapon ahi. Ahinlah nikhat kah'a Goliath anatha jeh in nikhat sung in Israel sung'a melma lenpenpa that in ahung pang tan ama ding in Israel lengpa hina ding mun ahung kido doh tan ahi. Kum somthum le get nakongchatmopa jong chu Bethsaida twikol pang'a akum kum'a dam ding'a ana um ahin, Jesu in kum le lha lut louhel in apettah in man gangtah in ana damdoh sah jeng in ahi. Numei kum 12 athia long nu jong chu anei agou le ijakai abeining'a jong damdoh jou-lou hijongleh Jesu in vang mitphet kahlouvin adamdoh jeng in ahi. Eiho ding'a ahitheilouho jouse hi Pathen ding'a man gangtah'a hithei jeng ahiuvin ahi. Jesu leiya alenlaiya mitcho elbai le paomoho jouse chu akum kum lut'a dammo hui jongleh Jesu in man gangtah'a adamsah jeng ahiuvin ahi.

Lazarus jeng jong nili jen lhankhuh a kivui hita jongleh Jesu in khatvei tah in akai thou thei jeng in ahi. Samaria khopi sung'a kel analhah'a akimvel'u Syria sepaite in aumkimvel vang uvin jan khovah kah in sepai jouse ajam mang jeng uvin Samaria khopia chun neh aneng jengjung in ahi. Thalpi kapho khun thalpi akap ding

teng uleh thalpi gui khu aha nungloi chan uva thalchang khu leng saova chule man gang ji ahi. Nangma hinkhoa jong Pathen in saotah na lhun ding le mangang tah'a na lhun ding adei jeh'a na hatah a na nungloi ji ahi. Na lhunna ding mun man gangtah'a na lhunna ding'a Pathen in na hinkho ahin nungloi tengleh ana kigong in Pathen in na chuhna ding mun na hin chuh sah ding ahi. Gari itol pet uva jong Accelerator iha lho chan uva gari halhai ahi. Chule mei kitina a thao ihachap chan uva mei ha kou cheh ahi. Hiche bang'a chu hinkhoa jong tahsanna ahat channa inatoh thilbolnauva hatna le man ganna um ding ahi.

Na lungtupho le na lungdeihohouse chung'a chun Pathen angung'a kisuhat kit inlang ama toh kilhon khom jing lechun Pathen in ahin tokhah nikho tengleh man gangtah'a Pathen na toh na mu thei ding ahi. Nang ding in kum le lha sotah lut ding hijongleh Pathen in vang mitphet kah louva na hin lhonpi ding ahi. Alangkhat'a Pathen hin chonset phu jong man gangtah tah'a alah ji ahi. Sodom le Gomorrah khopi jong man gang tah in ana sumang in ahi. Leng Agrippa jong man gang-

tah in ahinkho analahpeh in ahi. Babylon khopi jong man gangtah in jankah in bang'a thu kisun sehseh in ana lamang jeng in ahi. Eiho hinkhoa setna le chonset ineihou jong hi ikisih lou uleh Pathen in man gangtah'a thu ahintan jeng thei ahin, hichu tijat umtah ahi. Chule Pathen hi ahung kit nikho tengleh mitphet kah louva hung ding ahin, gucha bang'a hung ding ahin na gelsang'a man gangjoa hung kumlha ding ahi.

Hiche nikho teng chuleh Christa'a hinna neiho in man gang tah'a ama inalamto ding'u ahin, Ama tahsan louho vang man gangtah'a thupi tanna'a lut jeng ding ahiuvin ahi. Tunin eihon Pathen man gangtah inei uvin ahi. Hiche Pathen chun phattheina lam hihen thutanna lam hileh mangangtah Pathen ahin jeh in kichih thei ngaiten ahi. Tunia Pathen lung nato leh Pathen in aphanttheina ga chu man gangtah in na hinpe thei intin, Pathen lungtoh lou nahileh athutanna ga chu na chung'a man gangtah'a ahin lhut jeng thei ahi. Pathen man gang ahina hepum'a hinkho mangkhom cheh ding in ikitem uvin ahi. Pathen in tunin hat tah

leh hangsan ding in eikou uvin ahi. Tahsa le lhagao ikalsonnau ikisuhhat uva ihansan diu thupi ahi. Pathen in tunin melma le kimaitopiho kicha lou le ging louhel ding in eidei uvin ahi. Muthei hihen mutheilou hijongleh eihon nitin'a kimaitopi in eiyu ahin eiho akicha le meidoi thei ihipouvin ahi.

Pathen in tuni chan in eikilhonpi jing uvin eidalhah ngai pouvin ahi. Aman eihonpinau le eidalhah lou jeh uvin ama phat gon dungjui in hinkhoa thil amanggang le amanggang lou ahung lhung jin, hetthem le kichih thei angaiyin ahi. Deuteronomy 31:6 "Hat jing uvin lang hang jing uvin, amaho khu kicha hih hel uvin, ging jong ging hih hel uvin; ijeh inem itileh nangma na kilhonpi jing jeng hi Pakai na Pathen, Ama ahijing nai; Aman na thonsah louhel ding da jong na dalhah lou hel ding ahi," ati. Pathen in tahsa le lhagao hinkhoa hat jing le hangsan jing thei ding chule mangang jing ding in eidei uvin ahi. Hat inlang hangsan in mangang tah a na tong Pathen in nang ding'a mangang tah'a na ahin toh jeng ding ahi.

Mission Column

*Rev. Lamkeng Lhouvum
Secretary Mission*

1. Mission field visit & Exchange Tour:

Nisim 9- 12th October nikho sung hi KBC Pastor Exchange Tour ahitoh kilhonin KBC Gambih 11 vilna akineijin, chuleh Sugunu Mission field visit akibollin ahi. Pathen lungset in Missionary Haridas Meitei leh Lunminthang @ Abraham Touthang gun chu najallin, Sugnu Mission field amachalin chuleh compound semtohna na le fencing sem jong akimachal jingin ahi.

2. Elijah Prayer Mountain Main Sanctuary natoh machal jing:

KBC Mission tohgon na noiya Elijah Prayer Mountain (EPM) muná natoh ama chal jingin ahi. Nisim 12th October chun Mistry natong ding hot hah lut ahitaove. Pathen lungsetna hoitahá sahchai ahithei na dingin taona in geldoh jingo ahi.

3. Mission field ho a Tahsan thah Baptized kibol pung jing:

Nisim 13th October nikho Meitei Baptist Church Tribal Colony a Tahsan thah Mr. Japan Meitei Pakai anga kipeh lutna aneitoh kilhonin , Rev Lamkeng Lhouvum Mission Secretary in Pa le chapa chuleh Lhagao Theng minin Tuilutna leh Pakai Anjon kin abol peh tan ahi.

Nisim 1st November 2020 chun Rev Jiteen Supervisor Nepali Mission field chun, a) Chingmeirong Mission field tahsan thah mi 5, b) Songphel Nepali Field mi 4 chuleh C) Moreh Hindi Mission field a mi 1 (khat) agomá mi 10 ho tahsana tuilut anaitaove. Pathen thangvah in umhen.

Nisim 20th October nikhon Pastor Bejenta Singh Kachikhul Baptist Church (Sangaithel Area) tahsan thah mi 8 Pakai mina tuilutna aneitaovin ahi. Pathen thangvah in um hen.

Nisim 27th October nikho hin Pastor Lunminthang Haokip Missionary to Nepal chun tahsan thah mi 2(ni) Pakai minin tuilutna anei taovin ahi. Pathen in itaonao asangin Missionary ho kidang tah in amang chan kipa aum lheh jengin ahi.

4. Missionary ho Camp & Tour Programme

Rev Letminthang Missionary to China, Nisim 8-11th October Sunga T. Champhai Youth Camp, 23-25th Chate Camp Head Quarter Fellowship, Chate camp Thingphai. Miss Neoshi Haokip, Miss Sherlyn Lhingpineng khongsai Pangjang B/C 15-18th Youth camp, Chate camp Head Quarter Fellowship, 24-25th October S Molcham Gb. 8 hiche kina hin Evangelist Pretty Lhingneilam jaona na in akimang chaovin ahi.

Pangjang Youth camp, kipa umtah in Pangjang Baptist Church KBC No. 3 a achesa 15-18th October sunga Youth Camp ana umin ahi. Khangdong mi 230 ho camper ahin anom lheh jengin ahi. Speaker Rev Lamkeng Mission Secretary, Ng. Neoshi leh Ng. Sherlyn ahin Pathen in kidang tah in a mang chaovin ahi. Pathen jallin khang doong tampin, Pakai chu huhhingpua akisanun, hinkho theng mang dingin Pakaiya kilhanna aneijun ahi.

Missionary Neoshi, Lhingpineng chuleh Evangelist Pretty Lhingneilam tulai tah 3-7th November sunga KBC Gambih No 16 Tour program anei laitah u ahin, alohin thein a dingun taona in geldoh u hite.

5. Ground le Gari thah thensona kin:

L. Jangnomphai Baptist Church KBC No. 7. nisim 28th October nikho chun Khosung Chavang golnop aneinaova, Ground Thensona leh Gari thah ho thensona chu Rev Lamkeng Lhouvum Mission Secretary in aneitan ahi. Hitobang kin gon anei naova hin Pathen vangbohna loupe tah chang jing tao hen.

6. Individual Mission Sponsored thah:

1. Pu Henkhopao Haokip KBC Centre Church Jaoujangteng Haosapu leh family in Pathen phat theibohna chapa Laigil ga Mr. Seigoulal Haokip minin October 2020 a konin Rs. 1000/ (One Thousand only) Mission sponsored ahin nei pan paove.

2. Ms Hohoi Manlun Pangjang Baptist Church KBC No. 3 Insung miten Mission sponsored dingin Rs. 2000/ (Two Thousand only) October 2020 Iha a kipan in ahung pang taovin ahi. Hitobangá Missiona natohna a taona toh thoa hung kipedoh insung mite jallin Pathen thangvah in um taken.

Men Column

Rev. Tongmang Haokip

Ref. 4/2/KBC/MD/DAS/2019

To,

The

Subject : 40th Annual Men Department Assembly Kouna
Amasan Pakai min in ngailutna salam kahinpeuve.

KBC Event Calender dungjuija ahung lhungding Dt. 9-11 December hin Men Department Annual Assembly ahi. Hiche Men Department Assembly a hi nangma jong thon louhel a Pakai min a hung pang teitei ding in temna le kouna kahin neije.

Amun : " Gothol B/C Church Gambih No 8.

Lhunkimni : Dt. 9th December

Aphatsung 10-11 December

Kikhenni : 12 December

Assembly Member dingho

1. KBC Men Work Committee ho jouse
2. Pastor Jouse
3. Gambih Men Work Committee jouse
4. Houbung a chairman & Secretary & Tresurer
5. Department President nukhahpen
6. Department Secretary nukhah pen.

HETSAH

1. Tukumhi lamkai thah kilhenna jong umding ahi.
2. Daplai ahijeh in eima ngaichat janpon etc. ikipohchek ding u ahi.
3. Registration fee Rs. 100/- Gambih a Assembly Messfee kipe ahitai.
4. Jingsah nilhah a Kaikhom le Devotion uding ahi
5. Seminar class 2vei umding ahi.
6. Gambih jouse Men Secretary Report hi KBC Office a November kichaimasanga nahin thot sohkeidingun temnale hetsah ahi.
- 7.

Women Column

*Ms. Tingneihing Kipgen
Secretary Women Department*

To,
KBC Women Department
Annual Assembly delegate ho

Subject: 48TH KBC Women Annual Assembly Kouna

Jesu Christa jal a ngailut umtah KBC Women Assembly member ho jouse amasa pen in kangailutna salam I Pakai Jesu min in kahin peuve.

Tukum hi kumbul a pat in Corona natna jeh in Convention langa kon a tohgon ho atam jo akivochoh in chujung leh akivohai jong aum tan ahi. Hijeng ta jong leh Pathen lungsetna jal a kum lhun assembly beh hi ibol thei tei diu kinep na lentah nei pum in hiche kouna leh hetsah na hi Houbung tin na hung kithot na chung chon in hiche KBC Thuso hi mangchan kahin bol kit in ahi. Hiche to lhon in anoija hin hetlouva khoh pha bep kahin tah lange:

Assembly member ding ho:

Former Women President (Anukhah pen)

Former Women Secretary (Anukhah pen)

Houbung Women Work Committee

Gambih Women Work Committee

Convention Women Work Committee

Child Evangelist, Children Director, Warden, LRC & WWH

Assembly phat hi homtho ahung um ding jeh in lhun kim nileh 1 Pm ma Session kipan ding in akigong in ahi. Hiti ahijeh chun delegate jouse 12:00 sunkim masanga hung lhung cheh dingin hetsah leh tem ihiuve

Mess Fee mikhat na Rs 400/- hiding ahi.

Convention a peh ding dol pelou lai jousen ihin kipoh cheh diu ahi.

Janpon leh nangma ngaichat alhing set in hin kipoh un

Pathen in KBC Nute jouse mangcha jing taken!

Kakipah e,

Pakai lhacha

(Tingneihing Kipgen)
Women Secretary, KBC

To,

The KBC Youth Department
Annual Assembly Delegate ho

Subject: 48th KBC Youth Department Assembly adia Kouna

Muntin le Houbung tin na um ja umtah KBC Youth Department Assembly Delegate ho jouse amasa pen in I Pakai u Jesu Christa min in kangailut nao le kaja nao sang pen chibai kahin pec heh uve.

Kuki Baptist Convention chena lhongpi le Event Calendar dungjui jin ahung lhung ding KBC Youth Department Annual Assembly hi 14-16 December 2020 (Monday to Wednesday) nikho chu ahitan, hiti ahijeh chun toh le tham chule che le vale nading tampi ana nei jong leo hen, chung'a hung kisei Annual Assembly phat le nikho a hi Pakai min na nahungkal song tei ding le hung jao cheh tei ding in tep na le hetsah na khoh tah in kahin neijin ahi.

Hiche to kilhon in anoija min chong cheng le kiminhpah chengse to thon louva hung pang/hinpo cheh ding in jong tem na avellin kahin-neijin ahi.

Assembly member ding ho:

- (i). Former Youth President (Anukhah pen)
- (ii). Former Youth Secretary (Anukhah pen)
- (iii). Houbung Youth work Committee
- (iv). Gambih Youth Work Committee

- KBC Youth Assembly um nading mun hi Kholep Baptist Church, KBC Gambih N0.4 mun hiding ahi.
- Convention Youth nap eh ding dol akipe lou lai ho jouse le bat nei ho jousen ihin kipoh cheh diu vin hetsah na ahung kineije.
- Janpon le nangma ngaichat thil le lo alhingset in hin kipoh tei jin.
- Pathen in KBC Youth Department phatthei boh cheh ta hen

Kakipah'e

Pathen le mipi lhacha

(Rev. Lunkhosei Tuboi)
Youth Secretary KBC

STS Column

*Rev. Dr. Paokhohao @ Haoneo Haokip,
Principal, Shalom Theological Seminary*

- Ngailut umtah houbung mite, STS library a lekhabu koina ding Rack 10 akichoh be in, masanga ho pumin 25 vel alhing tan, hicheho jousea hi lekhabu koidim teiding kiti ahi.
- Worker hon ajohkam cheh un lekhabu tampi ahintoh doh khopset tauvin, ahintoh ho jouse chung a kipa thu sangtah ahung kiphongin, ahintoh loulai jousen Jong ihintodoh teidiuvin avelin Pakai minin taona ahung kinei kit e.
- Worker hobou hilouvin, houbung mihon jong theology lekhabu ho khel khel hihih jongle, secular lekhabu ho hijongle pakai min a itodoh thei chanu ihintodoh diuvin temma le taona sangtah ahung kineiyn ahi. Mimal (Individual) hihen houbung min a hijongle koitobang lekhabu todingla kaneipon, hijongle STS library a koiding lekhabu chohna din kajokham khamin sum hijat hintoh Inge,, tiho jouse Jong kipah tah in akilem jinge.
- I-College u Affiliation kidel hi gangtah a muteina dia library a lekhabu koiding angaicha jat hi STS a dia budget inakai nauva kon a chohdoh jouhoi ahitah Lou jeh a hiche tepna (Appeal) hi hung kibol bol jeng ahitai, Chimchah umtah anahikhah tah jongle Pakai minin gelthem ham hamutin, toh molsona din kitho khomutin, pan lakhomute tin temna le taona sangtah ahung kineiyn ahi.
Pakai min a temna le taona hin nei STS Principal le atokhkompi Faculty ho le Staff ho.
- KBC in Theology sim B.D/M. Div a pat chunglang final year ho Scholarship kipeji chu tu (2019 - 2020 kum) a din application form akilhatai. Hard Copy Form hi KBC office a Miss Congneo Haokip, P.A to General Secrrtary kom ahiloule Mrs. Vahboi Baite. Receipt & Issue kom a 9th September, 2020 nia pat a lahthei/muthei ding ahitai. Ahiloule PDF a hung ki upload hi print out kibolthei ahi. Apply bolding dan instruction ho form a ajaotai. Last date of form submission- 18th December, 2020.
- Senate of Srampore/ ATA noiya full fledged/ accredited college a sim second year chan a second claas a pat chunglsm mark mojou hon bou apply abolthei diu, amahon bou amuthei diu ahi. Hetchetbe nom hon noiya kipe number a hi hindoh thei ahi.

KBC HOLISTIC DEVELOPMENT

Coordinator, Holistic Development Committee, KBC

PROJECT SEMINAR: Wholistic Development, KBC in khantou machal na dingle khovel/environment venbitna ding chule miho kihinso theina ding tohgon akineijing in ahi. Hitoh lhon chun AbaFarms India toh kitho khom a farm (turmeric, ginger, lemon grass and drumstick) bolding tohgon lolhin theina dingin Houbung miho kom a awareness/seminar akibol jing in ahi. Kipa umtah in KBC Houbung tampin jong kipah tah in hitabang khantou machal nading lampi isang thei tauvin ahi. Wholistic Development in anoija houbung/centre munho ah seminar anakibol in ahi.

1. Tingkai Baptist Church, KBC No. 7
2. Tintong Lajang Baptist Church,, KBC No. 7
3. Kotlen Baptist Church,, KBC, No. 7
4. Joupri Baptist Church,, KBC, No. 7
5. Thangbuh Baptist Church,, KBC, No. 7
6. Songjang Baptist Church,, KBC, No. 6
7. Tujang Vaichong Baptist Church,, KBC, No. 6
8. Kotlen Baptist Church,, KBC, No. 6
9. Molnoi Area, Gambih Center, KBC, No.16
10. Haolenphai Baptist Church,, KBC, No. 15
11. Lhangcham Baptist Church,, KBC, No. 15
12. Khodengthabi Baptist Church,, KBC, No. 15
13. Sangaikot Baptist Church,, KBC, No. 11
14. Khopijang Baptist Church,, KBC, No. 21
15. Khangbarol Baptist Church,, KBC, No. 13
16. Pangjang Baptist Church,, KBC, No. 3
17. Mata Lambulane Baptist Church,, KBC No. 8

ORGANIC PRODUCT

Tahsa damtheina ding'a neh le chah theng lou le ai (Fertilizers and Pesticides) jaona lou angaichan ahi. AbaFarms India toh kitho khomna amachal jing toh lhon in Organic (lou le ai jaolou) Phing (Ahlu/potato), Changnam (Onion) chule Chache (Tea leaf) Bazaar



(Market rate) sang'a lhomjoa mutheija ahung umding ahi tai. Organic anche lou hinghohi Market Rate alhom pen jong Rs. 100 chung lam ahi, hijong le AbaFarms a kona imu diu ahi potato - Rs. 40 per Kg, onion - Rs. 40 per Kg, Chule tea leaf - 800 per Kg ahi (Chache hi mun dang'a KG khat a Rs. 2,000/- val man ahi). Chule AbaFarm Organic Producet hohi Bazaar/ Dukan (Market) dang bang'a alhom pet atam pet um talou'a kumlhung keija hiche Rate a hi kichoh jing ding ahi tai. Lou le ai jaona lou tahsa damtheina ding in kichoh cheh ding in ana kigon ding in Houbung miho jouse temna ahung kineiyn ahi.

HOUIN THENSONA



H. Gamnom Baptist Church, KBC Gambih No. 11 Houin kisathah chu Rev. Pillar Paosei Haokip, Gambih Pastor kin thempu hina in October 2, 2020 nikho in Pa Pathen, Chapa Pathen le Lhagaotheng Pathen min in thenso ana hitai. Pathen in houbung phatthei boh jing hen.

Office Diary

October 4, 2020: KBC Event Calendar dungjui in KBC pumpia Youth Day mankhomna ana um in ahi. Houin kikai theilouna mun phat bep ana um jongleh houbung phabep in nom in anamang uvin ahi.

October 4, 2020: Pastor Lamkhogin @ Hegin, Pastor, KBC Gambih No. 14 le inneipi in chapa melhoi tah khat Pathen akon in ana nei lhon tai. Ikipapiuve.

October 8, 2020: Dingpi Mission School, (DMS) chun Annual Sports ana bol uvin ahi. Hiche kin achun Rev. Dr. M. Thongkhosei Haokip, General Secretary cum Education Secretary Chief Guest in ana pang in, Dr. Ngamkhai Mate le Pu DP Haokip chu Guest of Honour le Functional President ana hilhon in ahi.

October 11, 2020: Event Calendar dungjui in KBC Pumpia Bible Quest lolhing tah in ana kibol chai tan ahi.

October 11, 2020: Lydia Resource Centre (LRC) muna um hon Gothol Taona mol'ah Fasting Prayer lolhingtah in ana chai thei tauvin ahi.

October 11, 2020: Mongkot Khopi houbung, KBC Gambih No. 8 chu Rev Dr M Thongkhosei Haokip General Secretary kinthempu hina in KBC houbung ding in phondohna le lah-lutna ana um tan ahi.

October 19, 2020: Pi Lhingnei Mate (Holthong nu) Centre Church Tuibong Houbung a kon in Lydia Resource Centre (LRC) vilna aga nei in ahi.

October 20, 2020: Re. SN Gangte, Former General Secretary, KBC ama inmun New Lambulane Imphal mun'a vilna KBC Office Secretary phabep in aga nei uvin ahi.

October 22, 2020: CBCNEI Annual General Assembly (Zoom) a ana um chu KNBC jong ana jao in ahi. KBC thalheng in Rev. Tongmang le Rev. Onkho in pan anala lhon in ahi.

October 27, 2020: KBC Evaluation Committee Meeting ana um in hiche achunna Workers phabep Transfer ana um in ahi.

GAMBIH LE CENTRE CHURCH

THU LAHKHOM

October 2, 2020: H. Gamnom Baptist Church, KBC Gambih No. 11 Houin kisathah chu Rev. Pillar Paosei Haokip, Gambih Pastor kin thempu hina in thenso ana hitai.

October 3, 2020: Sarang Baptist Church mun'ah KBC Gambih No.12 Men Department Anngol taona lolhing tah in ana kichai tan ahi.

October 4, 2020: Gambih No. 1 executive Tour Centre Church Haokip veng in vailhunna le chadonkhompina ana nei uvin ahi.

October 4, 2020: Twilelon Baptist Church, KBC Gambih No. 12 mun'ah Pastor Lhunkhongam Haokip, Gambih Pastor kinthempu hina in tasan twilut ana um in ahi.

October 4, 2020: Vangset umtah in Kotlen Baptist Church, KBC No. 7 mun'a Chanu Hathoiching Haokip (3yrs) in eina mollem santauve. Pathen in adalah insung mite lungmonna pe jing tauhen!

October 4, 2020: Vangset umtah in Kotlen Baptist Church, KBC No. 6 mun'a Chanu Nengchanhoi Guite (3 yrs) in eina mollem santauve. Pathen in adalah insung mite lungmonna pe jing tauhen!

October 4, 2020: KBC Gambih No. 16 Youth Department Anngol Taokhomna chu Pastor Thangmang, Pastor, KBC No. 16 le Rev. Lettinlal Chongloi, Pastor, Centre Church speaker hina in nungah gollhang mi 251 panna in lolhing tah in ana kichai tai.

October 4, 2020: Gambih Executive, KBC No. 8 in Evangelist Helun chongloi damlou vilna le taopehna ana nei uvin ahi.

October 4, 2020: Khomunnom Baptist Church, KBC Gambih No. 3 Revival Camp chu Pastor Haopu Haokip, Principal, Dr. Colvin Academy Speaker hina in lolhing tah in ana kichai tai.

October 7, 2020: Kipgen Veng Baptist Church mun chim in ana suhset jeh in Gambih 8 Executive in vilna le taopehna ana nei uvin ahi.

October 7, 2020: KBC Gambih No. 20 Gambih Conference lolhing tah in Molpi mun'ah ana kimang chaitai.

October 9, 2020: Centre Church NGV a Pu Thanglam Manlun chanu Ng. Chongngaiching @Chingboi Manlun, chu houdantheng'a jinei ding in Pastor Thangneo Haokip, Church Pastor in Iahdohna ana nei tan ahi.

October 10, 2020: Vangset umtah in Centre Church Tujang Vaichong a Pu Lhunkhohlen in tahsa hinkho eina dalha tauve. Pathen in adalhah insung mite lungmonna pe jing tauhen!

October 14, 2020: Vangset umtah in Rev Dr Mangkhosat Kipgen Former Principal, Eastern Theological College Jorhat Assam chu tahsa damlou na akon damdojhjou talouvin Zion Clinic Churachandpur munah atahsa hinkho ana mollem tan ahi. Pathen in adalhah insung mite lungmonna pe jing tauhen!

October 17, 2020: KBC Gambih no.21 Mission mopohna noija kingon An-ngol taona chu Khopijang Baptist Church mun'ah Rev. Onthang



Haokip, Gambih Pastor speaker hina in lolhing tah in ana kichai tan ahi.

October 17, 2020: Gambih No. 8 Mission Board tohgong Bible Verse Quotation Board chu Gambih Executive cheng jaonan Rev Dr P Chongloi Gambih Pastor in thensona aneitai

October 18, 2020: Pangjang Baptist Church Chapang Camp chu mi



230 jaona in lolhing tah in ana kichai tai.

October 22, 2020 : Vangset umtah in Samukom Baptist Church, KBC Gambih 20 a (Samukom Village) Haosa, Pu Lunkhomang Haokip chu 8:10 pm chun Angailut insung mi le Houbung mi cheng dalhan Pa kom'a choldo din anache masa tai. Pathen in adalhah insung mite lungmonna pe tauhen

October 27, 2020: Vangset umtah in Maokot (KBC Gambih No. 17) inpinu Nu Hatneng chun aleiset hinkho ana lha tai. Pathen in adalhah insung mite umpi jing taken!

October 27, 2020: Vangset umtah in Centre Church Salem Saikul a um Gl. Kamgoumang in tahsa hin eina dalha tauve.

October 27, 2020: Vangset umtah in Centre Church Salem Village, Sapormaina a um Pi Lhaijalam Haokip in tahsa hinkho eina mollem san tauve. Pathen in adalhah insung mite lungmonna pe jing tauhen!

October 30, 2020: Gambih No. 16 Pastor le atohkhompicho in Gari koina ding lolhing tah in ana semchai tauvin ahi.

October 31, 2020: Gambih No. 8 Gambih Center Gate le Fencing phatah in bol chai in ana um tai.

ATM BOOTH

KBC Office Gate kom chet'a SBI ATM Booth khat semdoh in aum tan ahi. Hiche hi japi ding'a thilphatah ahina ban'a KBC mite ding'a jong pha dehset ding'a ginchat ahin koi tobang KBC Office lam hinjonho injong hahsa louhel'a Gate a sum ikilah jing thei'u ahitai.

Ref.1/1/KBC/GAC(1)/2019

21st October 2020



68th GENERAL ASSEMBLY KOUNA

Amun : B. Vengnom Centre Church, KBC No.8
Lhunkimni : 25th January 2021
Nipini : 26th – 28th January 2021
Kikhenni : 29th January 2021

Pakaija ngailut umtah, KBC General Assembly member ho jouse, min ngei chungnung i-Pakaiju Jesu Christa minin kangailut-na chibai kahin peuve. Calendar of Events, dungjuija chungna kipe mun le nikho sunga hi 68th KBC General Assembly umding ahi. Hijeh chun, member ho jouse ikiloikhomnau ngailutna jal a thonlouva hungpang cheh dingin temna le hetsahna kahin neije.

Assembly Member dingho chu:

1. Houbung thalheng Baptised member 100 changei thalheng 1, Baptised Member 100-200 chan thalheng 2, Baptised member 200 chunglam ahileh thalheng 3 hiding ahi.
2. Convention Workers General & Missionary & Evangelists ho,
3. Convention level a lo beija kigoi (Elected) ho jouse (President, Vice-President, Assembly Secretaries, Auditors, Committee/Board hoa member jouse)
4. Gambih Chairman, Secretary, Gambih Department Chairman le Secretary ho,
5. Pensioner ho, KBC Deputation ho jouse,
6. KBC Ministry – Women, Men, Youth hoa Work Committee ho,
7. Ex-President ho,
8. Member At-Large mi 2,

(Rev. Dr. M. Thongkhosei Haokip)

General Secretary

Kuki Baptist Convention (I)

1. Assembly a dinga thil angaicha jouse eiman kipoh cheh ding ahi.
2. Registration Fee hi mikhat na Rs, 1000/- hiding ahi.
3. Pension lhahding jong mi 4/5 aum e.
4. Ordination le Licentiate bolding agoma mi 23 aum e.
5. Kumdanga banga Assembly session sung goh hilouva jingkah/nilhah houk homna ima a jong pang cheh dingin hung kigo cheh un.
6. Lhunkimma akilhun kimcheh banga kikhen nia kikhen khom cheh ding apha.
7. Tukum hi lamkai (Honorary Officer) ho kilhenna kum jong ahi.

Thuso Thudol'a Hetsahna

KBC Thuso Editorial Board kiphatsahna dungjuiyin Thuso hi nasatah'a semhoibe ding akigel toh lhon in houbung mite tosotna nasatah in akingaicha in ahi. Lhaseh Thuso thua het ding'a phaho:

- *Editorial um jing ding a ahin, Article le sermon um jing ding ahi.*
- *Thuso sung'a Department-ho thudol, Centre Church-ho thudol, Gambih-ho thudol hetna ding mun akipe in, ama ama dinmun'a thuso sonomho in lha jousea nisim 1 (Date 1) a Jt. Editor kom'a pehlut cheh ding ahi. Whatsapp a penomho in 9862107393 a thot thei hiding ahi.*
- *Article hihen Sermon hijongleh chule tahsa le lhagaova machalpi thei le phatchompi theiho hin sun nom jouse in asut thei cheh ahi. Ahung kisun jouse chu sotei tei ding tina hijeng louva Editorial Board in vetchilna aneiya angaichat leh edit jong abol thei ding'u ahi. Whatsapp a penomho in 9862107393 a thot thei hiding ahi.*
- *Article, Sermon, Report le adang dang hin sun jouse in ahithe channa soft copy a hin thot ding ahin chule ahithe channa spelling hihen thuche dan hileh semt-upsa cheh a hinpeh ding ahi. Thu kisun jouse adihna hihen adihlouna hileh asunho mopohna hiding ahin, Editorial Board mopohna hilou ding ahi.*
- *Thuso hi houbung mite in atam theipen'a sim ding akidei toh lhon'a member-hon ilah cheh ding uva tem ihuive. Chule houbungho a Department jouse jong copy hung kithot cheh ding ahin kipah tah a ana sim cheh ding'a tem ihuive.*

-Jt. Editor

KUKI CHRISTIAN-HO THUSIM'A AMASAPENHO

(Lhakit leh banjom ding)

- 1. October 20-24, 1958** kum in Keithelmanbi Baptist Church mun'ah KBC Assembly masapen ana kibol'e.
- 2. August 12, 1958** nikho in Imphal Christian Centre Church (tua MBC) mun'ah KBC Council masapen anakibol'e.
- 3. Rev Seikholet Singson** chu KBC Ordination Committee Chairman masapen in anahi.
- 4. Evan. Kaingul Chongloi** chu KBC sung'a Nepali Project a Evangelist kisol masapen anahi.
- 5. Evan. Dharmo Singh** chu KBC in Plain (Phaicham) Evangelist a ana kisol masa pen ahi.
- 6. Pu Hawngam Haokip**, KBC Executive Secretary chu Editor masapen hina in KBC Thuso 1968 kum in anakiboldoh in ahi.
- 7. Pu Lenkhosei Kipgen** chun 1968-82 changei KBC Youth President masapen hina anapon ahi.
- 8. 1973 kum in Pu S.N. Gangte** chu KBC sung a Youth Full-time Secretary masapen in ana pang pan in ahi.
- 9. Pi Hatkhoneng Haokip** chu KBC Women Secretary masapen ahi.
- 10. Pi Hatkhonem Haokip** chun 1970 kum in KBC Women President masapen hina ana tuh in ahi.

LHAGAO HINKHO PUI HING THEI THUGOLHO

01. *Mitthah khun alha akimun pon chule ahoina jong akihet poi, ahinlah midang invang alha le ahoina jouse amu thei uve akitin ahi. Eiho jong chutobang chu ina hinom jiuvin ahi.*
02. *Ipi phung le chang, numei le pasal, hoi le hoilou in imacha apopoi, mihem jouse sung'a lolhinna aum cheh in ahi.*
03. *Leisetna hin mi khat hinkho man dan le hinaho kilah thei le chomkhat kah a mang cha thei ihipouvin, eima eima hatna le hinna abou lam ikijot cheh ding'u ahi.*
04. *Mol chung kal le kal lou hi eima thu thu ahi, ahinlah mol chung akon a hung kum lhah ding hi nop le nop lou thu hilouva kibol ahi.*
05. *Na hatna, na bol theina chule na lhahsamnaho na kihetdoh masat pen angai in, hiche jou teng chuleh hiche dungjuiya chu hinkho na kipui ding ahi.*
06. *Mi tamtah in midang hinkho hindan alah nom jeh uvin alolhing jou jipouvin ahi.*
07. *Eima hinaa hinkho man ding kitih eima kigelna le lunglutnapa chu ahin, hichu thil ijakai aphantna lampi ding'a pan lahna chu ahi.*
08. *Midang lunglutna le thanopna hilouva eima lunglutna le thanopna chepi hin lam eilhunsah jou ding'u ahi.*
09. *Nangma hin dan mong mong'a na hindoh tengleh na kipa ding chule na deina lampia na kimanchah thei ding ahi.*
10. *Eima hinaa hinkho man ding kitih midang lunggel jong lah thei, mi thumop jong kilah ding amavang eima tup le doina mun lhunna ding'a hinkho man ding tina ahi.*

KITHOPINA NGAICHAT

Gl. Jangkhogin Haokip, Molnom, KBC Gambih No. 16, Tegnoupal District in 13th August, 2019 nikho in Gari Accident anatoh in khohelouva aum pet in Jivan Hospital Kakching mun ana kilhut in, Raj Medicity, Imphal'a phat sottah akijen kit in chujouvin RIMS Hospital mun alhung kit in lhagup (6 Months) tobang Hospital um ahitan, sum-le-pai chuleh phat tampi sumang in a'insung miten anaboipi uvin tuchan injong phatdomna (improvement) aum theipon ahi. Amahi alhoh (Brain) a thisan chang ahi'n tuchan'a kihoupi theijong hiloulai ahi. Inchen hahsa genthei insung ahijeh in munchom gamdang'a pohding jong sum-le-pai umlou jeh in imacha deibang in aumjoupon, hijehchun hiche KBC Thuso mangchan muntin'a um loilepai chuleh nule pate hon Pathen heng'a taona inei peh uva chule sumlepaia panla thei thei injong ijo kham kham uva ikithopi thei u ahi. (Tuletua aumna RIMS Surgery Ward C/4. Contact No.6909013059 Pu. Hemlet (Apa). SBI A/C No.34503575283. IFSC Code. SBIN0009990).

Pastor Limminthang Zou, Pallel Molnoi, KBC Gambih No. 16 in 2019 kum bul apat in kal (Kidney) natna ana neiyin, RIMS Hospital Imphal mun'a phat sottah akijen nung in kal suhthengna (Dialysis) ahung kibol toupeh in ahi. Ama khohelouva akijen jinglai in apenna anu in ana dalha kit in ahi. Tuni chan in insung gentheinaho thoh pum in adammona akon damtheng thei louvin akijen jing in ahi. Pathen lenggam na atohna kalsongbe thei talou le insung dimmun machal thei talouva aum jing lai in houbung mite in Pathen heng'ah taona in kop jing ute. Chule s sumlepaia panla thei thei injong ijo kham kham uva ikithopi thei u ahi. (Tuletua aumna Molnoi Pallel, Mobile Number – 8730957656 | UTBI A/C No. 0256010834544. IFSC Code. UTBIOKAK345).

Evan. Helun Chongloi, Churachandpur, KBC Gambih No. 8 in December 2019 akon in alol (Neck) natna (Thyroid) dammona ana nei jeh in Advanced Hospital, Imphal munah Operation ana challha in ahi. Hiche jou chun RIMS Hospital a akijen jom in achaina in Delhi khopia AIMS Hospital muna'h aga kijen kit in tuni chan in dam

theng louvin aum in ahi. Thyroid natna jengseh hilouvin BP jong asang jing in chule kolnat (Pile) natna jong anei in ahi. Pathen lenggam na atohna kalsongbe thei talou le insung dinmun machal thei talouva aum jing lai in houbung mite in Pathen heng'ah taona in kop jing ute. Chule s sumlepaiya panla thei thei injong ijo kham kham uva ikithopi thei u ahi. (Tuletua aumna Changleiveng, CCPur, Mobile Number – 9366091514 | SBI A/C No.38319336789. IFSC Code. SBIN0006182).

Pu Thanghopao Haokip, Centre Church Tuibong, Churachandpur, KBC NO. 8 hi akal (Kidney) alangtogel'a dammo ahin, adammo na kumkho jong anasot tan ahi. Damdohna ding in Manipur hihen lang Delhi (AIMS) hijongleh ana kalsong in ahinlah kinepna bang in damna lam amano thei pon ahi. Pu Thangpao hi Centre Church Tuibong a Houbung Secretary masa le tuletua Building Chairman jong ahi. Pathen lenggam na atohna kalsongbe thei talou le insung dinmun machal thei talouva aum jing lai in houbung mite in Pathen heng'ah taona in kop jing ute. Chule s sumlepaiya panla thei thei injong ijo kham kham uva ikithopi thei u ahi. (Tuletua aumna Tuibong, CCPur, Mobile Number – 8837082309 | SBI A/C No31286898959. IFSC Code. SBIN0006182).

Evan. Zamkholal Haokip : 24th November 2018 nilhah in BP Stroke ana neihin ahi. Shija Hospital, Imphal ah hapta khat IC Ward ah ana um in aban in RIMS, Imphal ah hapta khat ana um kit in ahi. Hiche jou chun Tens Company, Churachandpur mun ah lha 5 tobang ahung ki jen kit in ahi. Hiche jou chun Meitei langol ah lha thum hung kijen kit in ahi. Chomkhat jou in nat chom khat (junthah lampang natna) anei jeh in Sielmat Christian Hospital mun'ah operation akibol kit in ahi. Tuni chan hin damtheng theilouvin aki-jen jing in ahi. Pathen lenggam na atohna kalsongbe thei talou le insung dinmun machal thei talouva aum jing lai in houbung mite in Pathen heng'ah taona in kop jing ute. Chule s sumlepaiya panla thei thei injong ijo kham kham uva ikithopi thei u ahi. (Tuletua aumna Bethel, CCPur, Mobile Number – 9612570296 / 8974188977 | SBI A/C No 30771474980. IFSC Code. SBIN0006182).

CONDOLENCE

LUNGHEMPINA



(L) REV. DR MANGKHOSAT KIPGEN -84

Rev. Dr. Mangkhosat Kipgen in tahsa dammona anei'a tahsa hinkho mollemna aneina chung'ah Editorial Board in lunghempina sangtah in aki-neiyin ahi. Pathen in a dalhah insung mite lungmonna pe jing tauhen!



Jangnomphai Chavang Golnop 2020



Chavangphai Centre Church Houbung miten Pastor pa kipapi na ananei un ahi.



Gambih No. 12 Men Department Anngol TaoRhomna Sarang Tampak B/C mun a ana kimang



Gambih No. 2 Nute leh Chassad Khomite a kon in An-me tampi ana kimu in, amaha jal in Pathen ithangvah uve.

Post Regd. MNP/81
Regd No. 18134/88



*Gambih No. 16 Youth Department Angol Taokhomna
lohing tah in ana kichaitai.*



If undelivered, please return to
The Editor. KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173

Gambih No. 20 Gambih Conference 2020
Lohing tah in ana kimangchaitai.